



Na tumaini halitahayarishi; kwa maana pendo la Mungu limekwisha kumiminwa katika mioyo yetu na Roho Mtakatifu tuliyepelewa sisi. Kwa maana hapo tulipokuwa hatuna nguvu, wakati ulipotimia, Kristo alikufa kwa ajili ya waovu.—**Warumi 5:5, 6.**

Katika karne nyingi za “shida na giza” na ambapo “hapana changamko kwa sababu ya dhiki” (Isaya 8:22) ikionesha historia ya wanadamu tangu siku wazazi wetu wa kwanza walipopoteza makazi yao ya Edeni, hadi wakati Mwana wa Mungu alipoonekana kama Mwokozi wa wenye dhambi, matumaini ya jamii iliyoanguka dhambini yalikuwa yamekitwa katika ujio wa Mkombozi ili kuwaweka wanaume na wanawake huru kutoka katika utumwa wa dhambi na kaburi.

Taarifa ya wazi ya kwanza ya matumaini ya namna hiyo, ilitolewa kwa Adamu na Hawa katika sentensi aliyotamkiwa nyoka pale Edeni wakati Bwana alipomtangazia Shetani huku wakisikia, “Nami nitaweka uadui kati yako na huyo mwanamke, na kati ya uzao wako na uzao wake; huo utakuponda kichwa, na wewe utamponda kisigino” (Mwanzo 3:15).

Wanandoa hao waliokuwa na hatia waliposikiliza maneno haya, walitiwa moyo kwa matumaini; kwa maana katika unabii unaohusu kuvunjwa nguvu ya Shetani walitambua ahadi ya ukombozi ya kuwatoa toka katika uharibifu uliofanywa kwa njia ya uasi. Japo ilikuwa lazima wateseke kutokana na nguvu ya adui yao kwa sababu walikuwa wameangukwa na ushawishi wake unaoghilibu na hivyo wakawa wamechagua kukutotii amri iliyo wazi ya Yehova, bado hawakuwa na haja ya kukata tamaa kabisa. Mwana wa Mungu alikuwa akijitolea kufanya upatanisho kwa damu Yake mwenyewe kwa ajili ya makosa yao. Wao walikuwa wapewe kipindi cha rehema, ambapo katika hicho, kwa njia ya imani na katika uwezo wa Kristo unaooko, waweze tena kuwa watoto wa Mungu.

Shetani, kwa njia ya mafanikio yake katika kumgeuza mwanadamu awe nje ya njia ya utii, akawa “mungu wa dunia hii” (2 Wakorintho 4:4). Mamlaka ambayo yaliwahi kuwa ya Adamu, yalipita hadi kuwa ya mnyang’anyi. Lakini Mwana wa Mungu alikusudia kuja kwenye dunia hii kulipia adhabu ya dhambi, na kwa namna hiyo akomboe siyo mwanadamu tu, lakini pia arejeshe mamlaka yaliyopotezwa. Ni kuhusu urejeshwaji huu, ambapo Mika alitabiri aliposema, “Ee mnara wa kundi, kilima cha binti Sayuni, utajiliwa; naam, mamlaka ya kwanza yatakuja” (Mika 4:8)....

Tumaini hili la ukombozi kupitia kwa ujio wa Mwana wa Mungu kama Mwokozi na Mfalme kamwe halijafutika mioyoni mwa watu. Tangu mwanzo wamekuwepo ambao imani yao imefikia mbali zaidi ya vivuli vya wakati uliopo hadi kwenye uhalisia wa wakati ujao. Adamu, Sethi, Henoko, Methusela, Nuhu, Shemu, Ibrahimu, Isaka na Yakobo – kupitia kwa hawa na wengine wanaostahili, Bwana amehifadhi ufunuo wa thamani wa mapenzi Yake. Na ilikuwa kwa namna hiyo, ambapo kwa wana wa Israeli... Mungu aliweka ujuzi wa masharti ya sheria Yake, na ya wokovu ambao ulipaswa kukamilishwa kupitia kwa kafara ya upatanisho ya Mwana Wake mpendwa (Prophets and Kings, 681-683).